

萬里行程  
隴蜀餘聞記





萬里行程記

祁韻士著

編主五雲王

編初成集書叢

種一他其及記程行里萬

中華民國二十五年十二月初版

朱

發行人

王雲五  
上海河南路

印刷所

商務印書館  
上海河南路

發行所

商務印書館  
上海及各埠

# 萬里行程記

清 壽陽祁韻士鶴皋著

西戌之役。余以乙丑二月十八日。自京師啓行。閱兩六月。至七月十七日。始抵伊江。時經一百七十餘日。路經一萬七百餘里。所見山川城堡。名勝古蹟。人物風俗。及塞外烟墩沙磧。一切可異可怖之狀。無不周覽徧歷。繫於心目。每憩息旅舍。隨手疏記。投行篋中。時日既久。積累遂多。亦自不復記憶矣。抵戌後。暇日無事。或愁風苦雨。獨坐無聊。偶檢零縑碎片。集而省閱。以寄情懷。略加編綴。遂爾成篇。余籍隸壽陽。其自京師至壽陽。十日程。素所熟游。不復割敘。祇就西行所未經者。起自太安驛。訖於伊江。一路程途里數。及景物大略。分注如左。以誌遠遊之迹。抑使他日東歸。可按冊而稽焉。

京師至壽陽。九百八十五里。由壽陽西行七十里。至

太安驛。驛爲壽陽西南境。四面皆高阜。驛居其中。如井。韓文公詩亭在焉。西有五峯山。山上出泉。冬夏不溢。不涸。謂之龍池。明時郭雨師居之。遇旱禱雨輒應。龍神最靈。碑言五禱五應云。由太安西南行三十五里。至什貼鎮。入榆次縣界。再三十五里。至

王湖鎮。此榆次北境最大之鎮也。前此驛路皆在山中。登陟者。以馬瘡爲歎。至是乃就平坦。西望川原無際。太原境內之山。爲之一開。由王湖西行三十里。至

永康鎮。鎮亦榆次所轄。居民引水溉田。流經村落屋宇間。活活可愛。由永康西行四十里。至

徐溝縣。縣北郭外。爲赴太原省會之路。其地水鹹苦。不耐茶飲。西行四十里。至

賈令鎮。鎮隸祁縣。舊有驛。今裁。民居多以甌爲樓房。原野脩整。力於耕作。西行二十里至祁縣。以春秋時。祁大夫食邑得名。再五十里至。

平遙縣。縣民服賈者多。城中廩肆縱橫。街衢皆黑壤。有類京師。蓋人烟稠密之故。西南行三十里至張蘭鎮。鎮爲介休縣所轄。城堞完整。商賈叢集。山右第一富庶之區。然風氣奢靡。路旁竟有乞食者。非復從前景象矣。西行四十五里至。

介休縣。縣南有綿山。狐岐山之勝。北有汾水環抱。地勢最爲雄厚。太原境內之山。至此一合。縣東十里。漢郭有道墓在焉。蔡中郎所書碑已亡。今存者。傅青主所摹。祠前漢槐尙茂。大數十圍。真神物也。將抵縣路旁。有文潞公故里碑。由縣西行出義棠鎮。折而南行。入山五十里至。

兩渡鎮。此靈石北境也。兩面山勢綿亘。汾水徑其中。如帶。山上村居。樓閣層疊。宛如圖畫。南行四十里至靈石縣。縣以瑞石得名。石在城北門外。南行登山十里至。

韓侯嶺。將至嶺。見山畔有小祠。俗呼夫妻廟。蓋虬髯遇衛公夫婦地也。石磴盤空而上。數十轉。路益陡峻。策馬至山巔。紅垣繚繞。爲漢淮陰侯墓。前有祠宇。頗宏整。下馬入拜謁。壁間詩甚夥。大抵當道者駐節所題。侯死長安。不解何以葬此。閱古碑則云。呂后旣誅信。函首送代。適高帝還師。駐蹕此山。遂命瘞之。後人爲起塚焉。由嶺南下三十里至。

仁義鎮鎮爲靈石南境。在韓侯嶺之下。形如釜底。南行六十里至。

霍州。仁義一線路行萬山中。午憩後。登所謂逍遙嶺者。雖土質無石。而陡峻與韓侯嶺南北相埒。回首若屏嶂。行半日許。稍展轉就平地。抵霍州。州爲古歲縣地。霍山雄峙東南。高出霄漢。蒼翠欲滴。卽霍太岳也。由霍州南行二十里至辛置鎮。又三十里至。

趙城縣。路繞汾曲。越數土陁。四圍山勢。至此一開。南行三十里至。

洪洞縣。初入縣境。路旁大書山川明媚四字於坊額。旋見溝塍方畝。春樹雲林。芳靄氤氳。青蔥滿目。氣象明秀。爲晉中第一。閒繞郭皆種荷花。自多佳趣。有聚瑞橋。惜余方春過此。未覩其勝。路旁有明韓忠定文故里碑。又余始祖河東公。本此邑大槐里人。明初徙居壽陽。今訪大槐里。竟無知者。蓋逆旅主人不足知之。匆匆一宿。未暇再訪。以俟他日。由縣南行六十里至。

平陽府。府城在平原突高處。爲古帝舊都。股肱大郡。年來適遇歲歉。頻仍風物。頗形蕭索。不稱遊者之望。城外有堯井。南行六十里至。

史村驛。驛隸太平縣。太平在府西南。孔道所不到。割此驛歸太平。爲往來供億計耳。將至史村。山畔有題巢父洗耳處者。不覺啞然一笑。惟豫讓橋在襄陵太平兩界之間。差可據耳。王阮亭謂在趙城。誤也。又中途有文中子故里碑。汾水從霍州流經平陽。時時與行人相觸。怒濤驚駛。至此不見。蓋折而西矣。由史村南行四十里至。

高縣鎮。鎮爲曲沃縣所轄。直隸省欒城。獲鹿。所出棉花布疋。販運者皆卸集於此。商旅甚多。南行三十里至。

侯馬驛。亦曲沃所轄。曲沃縣治在其東北。卽春秋時新田晉都也。自平陽南來。土肥饒而民淳厚。村堡雲連。景象雄闊。有陶唐氏之遺風。凡平陽境內之山。至此又稍一合。南行二十里至隘口鋪。又西南行二十里至。

東鎮。出侯馬。渡澮水。登岡隴。但不甚峻。高阜之田。其平如盤。層層映綠。極可觀。鎮隸聞喜縣。西南行四十里至。

聞喜縣。縣城小而地勢開敞。土厚水深。爲晉舊都。中條山。表延東南數百里。蜿蜒如龍。道左多石碣。率皆表揚貞節德教之所爲。風俗近古。裴晉公祠。亦在道旁。北來山勢。至此又稍一開。西南行四十里至水頭鎮。水卽涑水。鎮有橋。水經其下西流。此鎮隸夏縣。司馬文正公故里也。西南行五十里至北向鎮。三晉雲山皆北向。鎮其取此而名歟。地爲安邑縣北境。閭閻極繁盛。南行三十里至油村鎮。鎮爲油聚之所。繁盛不減北向。猗氏縣所轄也。西南行三十里至。

樊橋驛。驛隸臨晉縣。地近蒲州。人民俱帶樸野氣。非復平陽富饒景象。若汾州太原。則愈華矣。此大略也。西南行三十里至。

高翁鎮。亦隸臨晉。蒲州境內麥田中。柿樹成陰。於麥無礙。仍芄芄長發。柿產最多。土人用以釀酒及醋。味

薄不足嘗西南行四十里至

寺坡底路自霍州迤邐趨下至此則下益甚地氣益暖將至寺坡見古柏森森欹生山畔極有致山上有寺土人云卽所謂普救寺此地距蒲州城一里許買茶者價頗廉西行人多攜之自聞喜山勢開後東南青嶂層出懷抱縈繞而前直至蒲州始盡以黃河爲之限折而東走不復合矣路旁有明楊襄毅博故里碑由寺坡過蒲州南行五十里至

可河從蒲州城南沮洳中登山麓循之南行抵辛店遙見長虹西亘如在天半御者告余曰此黃河也已而入土嶺中行不復見至可河村落甚小又見華山仙掌聳出天表西南青蒼之氣咄咄逼人覺心目爲之一爽洎臨河濱仰觀潼關倚水突起壁立千仞其下洪流怒號滔滔而來令人又生怛怖余過此在三月念四日夕陽西墜天色如墨呼船急渡幸風力差微篙楫無驚夜漏初下始敏關焉山陝二省以黃河爲界河東爲山西河西爲陝西冀雍之分自古然矣計自可河南行二十里至

潼關關自漢以後始著秦時所謂函谷關在此關之東今澠池境也秦關百二潼關爲首雄壯莫比未入關疑其矗立之勢若車不得方軌馬不得連騎者比至乃寬然有餘堂皇大路若履平地直西而行殊非意料所及地阻山中極高而氣候極暖亦奇西行四十里至

華陰縣自潼關迤西官柳夾道如界畫然乃知兩行秦樹直良非虛語長安道上按轡徐行緬懷百代興亡千秋歌咏皆同雲烟過眼轉瞬輒空惟見太華芙蓉終日爭奇競秀于前目不暇給雙輪西轉山逐

車行。滴翠拖藍。撲人眉宇。流連愛慕之情。不得已。已。華陰縣裏。無數綠柳。陰濃成衙。徙倚女牆。隱現林表。絮飛徧地如雪。真仙境也。縣在華山之麓。城東五里有華嶽廟。畢中丞所建。頗闊壯。此地。在漢爲宏農。路旁有漢楊太尉震墓碑。由華陰西行七十里至。

華州。嘗閱華山圖。爲之神往。今親履其地。飽看山色。馬上車中。有流覽臥遊之樂。山之高峻。所謂只有天在上。並無山與齊。其言確甚。然乘驛看山。終未一一領略。他時再過。當躡屐暢遊也。州亦在華麓。城東爲郭汾陽故里。有祠宇。由華州西行五十里至。

渭南縣。縣居渭水之隈。青疇綠野。四望無涯。西行四十里至。

零口鎮。春日賽會。游女如雲。西行二十里至新豐鎮。尙存古名。再二十里至。

臨潼縣。縣倚驪山下。萬松蒼然。城近始見。山半行館。樓檻縈迴。擅泉石之勝。天然佳妙。溫泉一泓。自石罅噴玉而出。匯爲數池。解衣就浴。塵氛頓盡。因憶開寶華清。風流如昨。而霓裳一曲。舞破太平。爲惘然者久之。西行三十里至。

灊橋。灊岸爲昔人贈別之地。楊柳依稀。感人離緒不淺。獨訝其何以無橋。土人曰。濁流迅駛。曾爲橋輒圯。不能成也。西行二十里至。

西安府。長安形勢。虎踞龍蟠。自古帝王之都。城外八水環流。抵東郭。始見百雉崔巍。遠則無睹。蓋林阜包羅。最爲雄厚。憶昔史所載。此城名大興城。隋時所築。始徙都之。隋以前皆都咸陽。卽今咸陽縣。客爲余。

言唐雁塔在城南歲歉則塔中分爲二却不傾歲豐則仍合焉城中多售竹器詢皆出自整屋鄠縣云計自京師至西安共二千四百八十里西行五十里至

咸陽縣過灃水橋渡渭至咸陽秦漢故都也城郭未見宏闊自非舊基出北門上峻坂古塚疊疊慨然歎古之豪傑不知青山埋却多少矣縣有孔道二西行爲入川路西北行爲入甘路四十里至

店張驛驛隸興平縣縣在其南西行三十里至

醴泉縣原隰寬平土脈膏潤唐太宗昭陵在縣南惜未往一謁西行四十里至

乾州此地唐爲奉天高宗陵在州北西北行五十里至

監軍鎮乾州所轄唐時多以宦官監軍稱軍容使此猶有舊名西北行四十里至

永壽縣岡阜漫衍愈上愈高隘口中開縣當其缺陁嶺之上有塔巍然下瞰城中一覽而盡西北行四十里至

太峪邠州所轄永壽在高岡之上循坂上下路甚紆曲涉流泉抵太峪復登土嶺峻甚索費馬力旣登則四望悉平蓋極高之地不見其高久之又下峻坂是爲邠州范文正公舊治也由太峪西北行三十里至

邠州古豳地自永壽至邠州人民皆穴土而居陶復陶穴遺風至今未改蓋土性堅可耐久他地爲之則將壓焉州城傍南山下包平地勢如龍館中牡丹甚茂邠西十數里有明岨山甚奇山之頂皆土其趾

乃皆石洞穴玲瓏不可勝數。備諸佛像沿山前進。桑棗成林。矮而秀茂。鬱鬱葱葱。令人思斧斯遠揚之句。又行十餘里。見石窟中大佛。高八丈五尺。就山石雕成。亦奇。由邠州西行四十里至

亭口鎮。亦邠州轄。陝省一帶堡堞。與河東大略相同。永壽以西則無堡。惟有土屋。至甘省隆德以西。乃又有堡。過蘭州則堡益多。所過驛亭。無不有堡。蓋地近邊。官爲之。與民間自築者不同矣。由亭口西北行四十里至

長武縣。縣在高岡上。自咸陽登隴。至醴泉乾州。路稍平。抵永壽。乃高峻嶺路。時上時下。至邠州又平。自邠西北行。則又高。長武爲最高處。視之乃成平地。四不見山。然偶有坎窞。則皆深溝高壘。天造地設。處處如是。客或語余。此地卽白起坑趙卒處。夫趙遠都邯鄲。長平之戰。卽今高平縣。地近上黨。而乃驅卒四十萬。坑于咸陽之北二三百里外。恐無是理。其謬不待辨也。由長武西行四十五里至

瓦雲驛。驛爲甘肅涇州轄。乃陝甘二省分界處也。西行六十里至

涇州。瓦雲趨涇。將下峻坂。見西來一峯。插天圓秀可翫。又見羣巒繚繞。烟樹蒼茫。極有致。次日訪之。則漢時所謂回中也。西王母宮在其麓。有宋陶穀碑。城倚山臨水。形勝最佳。西有涇汭二水。清流映帶。心爲灑然。因憶涇渭清濁聚訟紛紛。詩言涇以渭濁。是涇水本清。因渭而濁。註家誤解耳。今觀涇水清甚。足驗其誤。由涇州西行三十里至

王莊。涇州所轄。州境桑棗成陰。田園潤澤。風景絕類邠州。西行四十里至

白水驛驛爲平涼縣轄自驛以東未見有婦女當鑪者至是始有之西行七十里至

平涼府。府城雄峻。涇水流其南。康熙間。叛將王輔臣據其地。久不下。文襄公圖海由虎山墩俯瞰城中。得其虛實。輔臣窮蹙。乃降。余昔纂史記其事。今虎山墩在城北。文襄祠在城東郭外。城西南皆山。崆峒山在焉。崆峒凡有五。非一地。此爲黃帝訪道廣成之所。太史公所遊也。時有元鶴翔舞山中。平涼之名。仿於古之高平第一。晉時南涼。西涼。北涼。皆在今甘涼二州之境。遠在河西。與此隴東無涉。西行四十里至。

安國鎮。平涼縣轄。平涼西行入山。氣象蕭疎。山勢漸合漸高。由安國西行五十里至瓦亭驛。此宋時所謂瓦亭關也。今隸固原州。州在驛西北。未至瓦亭二十里許。兩山夾峙如門。僅容一轍轉側而過。水嚙山根。瀾瀾然。險要莫比。過此。則嵯峨萬仞。疊起雲間。循澗前進。如坐井觀天。山高日落。路脩馬疲。人亦憊甚。由瓦亭西行二十里至。

六盤山。白瓦亭行十餘里。曰和尚坡。爲六盤之麓。余晨興到此。微雨初零。土人以泥滑阻。余莫前。僕者恃其勇不聽。遂登路曲折陡峻如壁。盤磴而上。愈上愈高。始猶土石相錯。雖濘尙可行。至山半。俗呼貓兒坪。有帝君廟。甚巍煥。新鑿之路。皆土覆石上。遇雨淖甚。已而雨愈大。泥益深。膠黏阻輒。色紫黑。雨忽變爲雪。濟之以風。烈甚。僕馬阻峻坂下。屢起屢仆。寸步不能前。余乃舍車而騎。鼓勇直上。雪花大如掌。風乃益狂。翻撲人面如織。身在風雪陣中。若騰雲霧而起。目迷口噤。馬亦股慄。望山巔有舊驛亭。馳往避。

及下馬入亭朽被撼欲倒。岌岌不可留。乃復乘馬陡下千丈坡。踏冰雪鑿鑿有聲。逕邇至楊家店。路稍平。有茅屋數家可憩。解衣烘焉。少頃雪復變爲雨。回視山頭皆白。氣繚繞不復辨。計此程五十里。上山下山祇二十里耳。而倉皇狼狽。一至於此。次日行李始度嶺。追至晚無枕寢。獨坐達旦。此豈天之所以窘余也耶。然亦殆矣幸矣。由六盤帝君廟西行。過嶺三十里至。

隆德縣。縣爲隴西第一衝要之地。景色荒涼特甚。而羯鼓紅牙。歌喉宛轉。四鄰幾徧。風俗淫靡。爲之慨然。西行四十五里至。

神林鋪。隆德所轄。西行四十五里至。

靜寧州。宋韓魏公治兵防夏於此。風景稍勝。西行四十五里至。

高家堡。靜寧所轄。路入坡嶺。登降者屢。西行四十五里至。

青家驛。驛隸會寧縣。坡嶺益甚。西行四十里至。

翟家所。亦隸會寧。坡嶺猶多。中途過王家川。入山澗中。但見高岸深谷。一水潏洄若線。乍東乍西。時時蹇涉。俗稱爲七十二道脚。不乾云。澗中土石多赤。西南行六十里至。

會寧縣。水自東北澗中來。向西南澗中去。此中土石皆白。與前澗赤者異矣。縣當其中。鎮山之口。西南行六十里至。

西鞏驛。安定縣所轄。驛在坡嶺高處。乏水。西行三十里至。

清涼山自西鞏啓行。卽越深澗。登岡阜。漸入清涼山。雖土質無巉巖石壁。而坡陡曲。不一其處。遇雨則泥滑難行。商旅憚之。地亦乏水。西行三十里至。

安定縣。東西驛路皆在山中。縣城稍平坦。西北行六十里至。

秤鈎驛。安定所轄。在高阜之上。路曲如秤鈎。故名。西行三十里至車道嶺。此嶺亦號難行。其陡曲與清涼山相似。西北行三十里至。

清水驛。金縣所轄。途經坡坨尙多。西北行三十里至。

三角城。亦金縣轄。楊柳垂街。蔭渠水。頗有致。西北行三十里至。

猪嘴驛。仍金縣轄。在西山下。林木森森。蔚然入目。蓋數日來童山如禿。求一木不可得見。至是始覺生趣盎然。西北行四十里至。

東關坡。猪嘴迤北。有所謂九溝十八坡者。土人呼爲大狼山。紆曲上下。極隘處轉側而前。坡盡。則蘭州在望矣。西行二十里至。

蘭州府城東衢路蕩平。直至坡下。目擊園畦叢薄。點綴道旁。心爲一暢。府城雄據黃河南岸。五泉山在城南二里許。稱名勝。遊人不絕。城北黃流浩渺。自西而東。有二十四舟爲浮橋。束水若帶。兩岸鐵索繫之。復用集吉草爲巨綆。維舟屬橋。渡者如履平地。北岸多酒樓。開窗臨水。南望城郭。林樹如畫。惟岸上山楮草木不生。僅有番僧寺宇耳。計自西安至蘭州。共一千四百二十五里。由蘭州西北行四十里至。

沙井驛。皋蘭縣所轄。在山澗中。南猶望見黃河。其地多赤土。而性疎易圯。侵澗水過此。則土之在地中者。往往塌陷似沙眼。四望皆頽垣敗壘。荒陋特甚。無寸草。土人以爲古營盤地。土崖高處。有帝君廟。碑云。曾顯應于此。寥寥數家。依廟而居。過數岡阜。忽見西南春樹雲生。參差掩映。兼有渠流引灌。滿目青蒼。乃平番之苦水驛也。由沙井西北行七十里。南折至。

苦水驛。平番縣第一驛。甘省驛之多者。莫如平番。有八驛焉。此其最東之驛。地名苦水。而水味實甘。惟色稍濁。原田萬頃。灌漑饒沃。西行五十里至。

紅城驛。平番第二驛。傍山椒而行。土色盡赤。沿流綠樹甚多。北行四十里。至南大通鎮。路平。再三十里。至平番縣。縣有二城。一爲莊浪。滿兵駐守。一爲縣治。相距五里許。縣在莊浪城之北。有孔道二。西行爲赴西寧路。北行爲赴涼州路。西郭外。商民錯處。雨縷。其土產也。由平番北行三十里至。

武勝驛。平番第三驛。起苦水紅城。過平番。至武勝。村落銜接。水木清腴。民居豐實。市閣縱橫。所過之地。徧生草蘭。馬足芬芳。爲西來第一沃壤。武勝之水。流出山口。清湛可鑑。毛髮。西行四十里至。

岔口驛。平番第四驛。地居險要。面面皆山。驛南有一山突起。巔巒若削。番民散處兩山中。帽以氈爲質。而簷微窄。男女皆然。女番。項背繫白色帶垂之。男著皮褲。女則赤腳而已。其人卽古之羌種。自平番界至西寧口。內外種落極多。由岔口西北行五十里至。

鎮羌驛。平番第五驛。爲最西之境。途間過一河。見滿山亂石。度烏梢嶺。峻甚。地氣極寒。西北行六十里至。

黑松驛古浪縣所轄前由武勝入山數日程皆在萬山之中勢險隘跋涉不易氣象亦甚荒劣絕少草木令人悶絕此驛猶在山谷直至古浪始出山耳由黑松西北行三十里至

古浪縣縣城鎮山口如鎖鑰然山勢忽開路亦平坦城南水畔有巨石上鐫天關玉闕四字疑是鎖字又一石名爲甘酒石疑卽平泉醒酒石之類或云研末服之可醫心痛未知然否北行六十里至

靖邊驛亦古浪轄從此驛起至永昌縣之水磨關二百五十餘里路雖平然皆碎石子與車輪相觸隆隆然竟日不已由靖邊北行四十里至

大河驛此武威縣轄也驛東北有一路設臺站可出寧夏達歸化城至京師爲邊外文報所經不須由蘭州西安迂道矣由大河西北行三十里至

涼州府府城勢閼敞面山而居其山巔嵒綿亘自塞外來卽古祁連山頂皆積雪不消盛夏日暖稍稍化水流入溝渠引以溉田爲自然之利自此西去雨澤率少惟恃雪水入田蓋河西自古富饒皆以此耳由涼州西北行五十里至

懷安驛驛隸武威西北行二十里至豐樂鋪又二十里至

柔遠驛亦隸武威驛東有振武將軍孫思克碑康熙間名將西北行四十里至三十里鋪再三十里至永昌縣風景開曠似靜寧州西行三十里至

水磨關過此村碎石子路始盡然漸登岡阜非復平路西北行四十里至

水泉驛。水磨關既過。約二十里許。有一帶沙岡。橫亘南北。無寸草。中途有王將軍進寶祠。亦康熙間名將。此驛爲永昌所轄。西行五十里至。

峽口驛。隸山丹縣。以兩山夾峙得名。地居山口。艱于水。山澗有一泉。取飲焉。約二里許。自涼州西來。折而北。所過隨山築牆。遠近高低不一。土人呼爲長城。然秦隋所築。西起臨洮。在今蘭州狄道之境。蓋以黃河爲天塹。安得至此。況秦時涼州。爲匈奴所據耶。此疑明時防守故垣耳。邊牆之外。爲阿拉善蒙古游牧之所。卽古賀蘭山也。由峽口北行四十里至。

新河驛。亦隸山丹。並無河。或驛路不經歟。西行四十里至。

山丹縣。焉支山在縣之北。卽漢時匈奴所歌。奪我焉支山。使我婦女無顏色者也。縣雖山僻。城有流水。風景尙佳。西行四十里至。

東樂驛。張掖縣丞。駐此分治。路多沙石。西行三十里至。

仁壽驛。張掖所轄。亦沙石路。途中過一河。西行四十里至。

甘州府。古張掖郡也。茂林蒼蔚。水亦清。天山黑水。俱在境內。天山卽祁連山。西北行五十里至沙井驛。此又一沙井。張掖所轄。驛西二十里。地名沙河。又十餘里。爲九眼泉墩。泉流甚細。綠草蒙茸。川原平曠。牛羊散嚙草間。有野趣。過此則嫌鹵地。不堪寓目。西行六十里至。

撫彝驛。張掖所轄。未至驛。有大沙岡。沒車輪難行。此地多水田。產稻極佳。西北行五十里至。